

欽定全唐文

欽定全唐文卷一百十九目錄

晉少帝

收瘞骸骨勅

祭中嶽令河南尹行禮勅

改泰州屬定州勅

答陶穀請禁伐桑棗勅

答桑簡能請斷冤獄封事勅

以郎署兼侍御史勅

賜高麗國王王武勅

答邊玆請五日一錄囚勅

禁橫薦官寮勅

禁選人妄陳文狀勅

答寶儀請禁酷刑勅

還幸東都御札

封錢宏佐吳越國王玉冊文

即位大赦文

夏令赦文

改元開運大赦文

收復青州大赦文

征契丹還大赦文

欽定全唐文卷一百十九

晉少帝

二

收瘞骸骨勅

契丹違天背惠猾夏渝盟無名侵犯於封疆縱暴殺傷於生聚毒流數郡怒積羣情果敗衄於漳川乃退歸於燕塞今則長驅虎旅誓滅胡塵雪萬姓之沈冤期四方之昭泰每念蕃寇經過之處邊隅陷沒之人未掩殮尸何安恨魄軫傷既切惠澤宜加其常定邢洺管界蕃寇經過之處枉遭殺害無主收葬者宜令本州差大將一人所在收瘞量

事祭奠訖具事以聞

祭中嶽令河南尹行禮勅

盧夏請河南尹親及廟貌冀表精虔在禱山川誠爲重事
且浩穰都邑豈可闕人今後祭中嶽宜令河南尹往彼行
禮

改泰州屬定州勅

朕惟泰郡素乃漢疆偶隸蕃戎久罹塗炭遇王師之進討
傾臣節以來降況地處要衝人推勇悍將控臨於黠虜宜
係屬於雄藩其泰州宜割屬定州爲屬郡以狼山寨主孫

方簡爲泰州刺史仍簡較尚書右僕射本州守禦都指揮
使充定州東西面都巡簡

答陶穀請禁伐桑棗勅

陶穀方思豐國切欲勸農以貿易於柴薪多砍伐於桑棗
請行禁絕宜舉科條仍付所司

答桑簡能請斷冤獄封事勅

囹圄之中縲絏之苦奸吏苟窮於枝蔓平人用費於貨財
繇茲滯淹兼致屈塞桑簡能體茲軫憫專有敷陳請長吏
躬親免獄官抑逼深爲允當宜在頒行

以郎署兼侍御史勅

御史臺準前朝故事以郎中員外郎一人兼侍御史知雜事近年停罷獨委年深御史知雜振舉之間紀綱未峻宜遵舊事庶叶通規宜却於郎署中選清慎強幹者兼侍御史知雜事

賜高麗國王王武勅

省所奏以先臣遺命及官吏推請權知國事事具悉圭茅積慶忠孝因心早彰幹蠱之名顯著象賢之譽雅當嗣襲深契物情見先臣知子之明成後嗣克家之美遠陳章奏

尤驗純誠欣慰之懷寤寐無已

答邊玗請五日一錄囚勅

人之命無以復生國之刑不可濫舉雖一成之典務在公平而三覆其詞所宜詳審凡居法吏合究獄情邊玗近陟周行俄陳讜議更彰欽恤宜允申明

禁橫薦官寮勅

諸道不許橫薦官寮爰自近年頗踰舊制起今後諸道藩鎮防禦團練刺史如本處幕席中有闕准元勅合奏薦當與除授不得橫薦前資賓從州縣官及諸色職員希於在

朝及外官安排不得有違

禁選人妄陳文狀勅

今年四月二十五日釐革應前資州縣官一考前丁憂一任除官雪活冤獄及在任日招添得戶口稅錢曾授御署官進策官諸州馬步判官諸色選人等今後並須準勅格參選不得直經中書陳狀近日有諸色人依前紊亂紀綱披陳文狀欲嚴行於懲戒先明示於指揮國家大啟銓曹高懸選格諸色選人宜歸常調合赴所司稍立政能足可進退豈得罔循常制唯務僭求勅釐革而不遵帖告示而

不退向路隅而陳接隨馬後以誼譁或稱罷秩家貧或訴
在京日久朝廷須存公道難徇私懷若事可施行雖朝陳
狀而夕得官未足言速旣理有違碍雖厯祁寒而經暑雨
不必言遲戚本自貽咎將誰執殊不知官不可乞勅不可
違若無誠懲何以齊整應諸色選人等並須準近勅取解
赴選其有招添得戶口增益得稅錢及雪活冤獄合該勅
條酬獎者仰於所司投狀如有司不與公當區分顯有抑
滯任經中書陳狀當與指揮此度分明告諭後諸色選人
等如更不稟指揮依前妄陳文狀當送御史臺勘問必無

輕恕仍付所司

答竇儀請禁酷刑勅

文物方興刑罰須當有罪宜從於正法去邪漸契於古風
竇儀所貢奏章實裨理道宜依所奏準律令施行

還幸東都御札

控制寰中梁苑得舟車之要撫寧河朔鄴臺有粟帛之饒
先皇帝肇啟基局咸昇都邑南北非遠來往是常今則時
正晏清候當和煦宜迴金輶往幸夷門宜取今月十一日
還幸東京應沿路州府並不用修飾行宮開治道路食宿

頓遞並以官物供給勿令科歛人戶側近州府長吏勿來
朝覲凡在遐邇宜體朕懷

封錢宏佐吳越國王玉冊文

惟天福八年歲次癸卯十月丙午朔六日辛亥皇帝若曰
在天成象拱辰分將相之星惟帝念功啟土列侯王之國
朕所以法昊穹而光宅稽典禮以疏封而況世著大勲時
推令器探寶符而嗣位仗金鉞以宣威羽翼天朝藩籬東
夏宜列諸侯之上特隆一字之封簡自朕心叶於輿論咨
爾保邦宣化忠正翊戴功臣起復鎮國大將軍右金吾衛

上將軍員外置同正員檢校太師兼中書令杭州越州大
都督充鎮海鎮東等軍節度浙江東西等道管內觀察處
置兼兩浙鹽鐵制置發運營田等使上柱國吳越國王食
邑一萬七千戶實封四千戶錢宏佐爲時之瑞命世而生
負經文緯武之才蘊開物成務之志英華發外精義入神
亞夫繼社稷之勲顧榮擅東南之美眷言祖考志奉國朝
清吳越之土疆執桓文之弓矢天資厥德代有其人荷基
構以克家事梯航而述職殊庸斯在信史有光是舉彝章
爰行盛典土茅符節方推翼世之賢黻冕輶車更重策勲

之禮斯爲異數尤屬眞王今遣使光祿大夫檢校司徒行
太子賓客上柱國太原縣開國男食邑三百戶王政使副
正議大夫行尚書吏部郎中柱國賜紫金魚袋趙熙等持
節備禮冊爾爲吳越國王於戲周寵元臣四履錫命漢封
異姓八國始王指河岳以誓功俾子孫而襲爵爾纂服舊
業朕載考前文勿忘必復之言更廣無窮之祚懋昭前烈
爾惟欽哉

即位大赦文

古先哲王開創丕業未嘗不櫛風沐雨旰食宵衣安黔首

於八紘保鴻圖於萬世恭惟先皇帝艱難啟運恭儉臨朝
以武功定寰區以文德安黎庶日慎一日無忘無荒載洽
隆平永傳基構顧惟冲眇獲奉纂承念負荷以爲難集哀
摧而罔極期終喪制旋逼羣情竭推戴以彌堅執讓辭而
不獲勉臨大寶以御兆民宜頒在宥之文用布惟新之澤
可大赦天下應天福七年七月十七日昧爽已前四京及
諸道州府諸色罪犯除十惡五逆殺人強盜官典犯贓合
造毒藥屠牛鑄錢諸色僞造假外其餘罪犯已結正未結正
已發覺未發覺咸赦除之已前諸色配流人等除終身不

齒常知所在縱逢恩赦不放還人及曾爲強盜已配諸處
收管人外其餘並放還其今日已前放還人內舊有職官
者量與敘用弔民伐罪用生懲勸之思改過自新必務含
宏之道其襄州安從進如能果決推誠一稟朝旨並從捨
釋各與官榮朕恭承顧命初嗣丕基而文武羣臣中外良
佐肅清輦轂保佐國家備彰忠孝之心咸竭推崇之力宜
覃恩渥用表旌酬在朝內外臣寮侍衛諸軍將校及諸道
節度使防禦團練刺史並與加恩修奉園陵考詳故實務
遵禮典副朕孝思凡曰在官悉能陳力爰逢昌運宜示溥

恩諸道賓幕將校職員見任京六品已下官州縣官三司
場院監治帶使額者普與加恩其諸道職員押衙已上與
轉官兵馬使已下與轉職懸車官秩前任職資載敦尚齒
之風爰示念功之典致仕官前任文武朝臣內諸使司已
下前任節度使防禦團練刺史行軍賓從少尹上佐官前
諸道都指揮已下前任京六品已下官及前資州縣官帶
使額場院官等並與加恩京師職掌夙夜勤勞竭力有聞
推恩無吝應在京諸司職掌亦量與恩澤奉守文之業敦
孝治之風宜加幽顯之恩用慰哀榮之意內外臣寮內諸

司使及侍衛諸軍指揮使已上父母在者與官封已有官
封別與遷改已亡歿者並與封贈已有封贈更與妻封贈
其有郡邑國號者與進封未有者與敍封曾竭臣誠歿於
王事良深悼往宜示賞延自天福元年後來文武臣寮中
有歿於王事者與追贈已追贈者更與追贈有子孫未有
職官者與錄用蝗蟲作沴苗稼重傷特示矜蠲俾令蘇息
應諸道州府經蝗蟲傷食苗稼者並差官檢覆據所損頃
田與蠲放稅賦仍委逐處長吏切加安撫務令存濟山林
逸士草澤遺賢將裨教化之風宜廣搜羅之道應有懷才

抱器隱遁邱園者委隨處長吏切加搜訪具以名聞敦崇孝義旌顯門閭式恢王化之基用正人倫之本應有孝子順孫義夫節婦委逐處長吏具名聞奏當議旌表於戲纂繼大業司牧羣黎小心必本於舊章恭已難忘於朽索不敢逸豫以召和平更賴將相大臣文武多士遵顧託於先帝永翊戴於沖人開保延洪爰覃渥澤報告遐邇咸使聞知赦書日行五百里敢以赦前事相告言者以其罪罪之

夏令赦文

朕荷上天之眷命守先帝之丕基日午坐朝恐一物之失

所夜分不寐思比屋之可封身雖安於九重心嘗懸於億兆屬飛蝗作沴膏雨久憊流民倍切於撫安征賦頻令於蠲減未能感召深軫焦勞念獄訟之繁當炎蒸之候欲臻和氣宜去深文特行寬大之恩用叶哀矜之旨應三京鄰都諸道州府見禁罪人除十惡行劫諸殺人者及僞行印信合造毒藥官典犯贓外人犯死罪者減一等餘並放內有欠官錢者宜令三司酌量與限監出徵理中外遐邇宜體朕意

改元開運大赦文

王者化家爲國既開創以維艱纂業承基亦負荷而尤重
朕虔承遺命嗣守丕圖顧眇躬而懼不克堪持小心而曾
無暇逸外以生靈是念內以宗社爲憂若涉大川如馭朽
索然猶功非及物德不動天蟲螟爲害苗之灾夷狄作亂
華之患尚賴謀臣猛將義士勇夫共成戡剪之功復致澄
清之運今則狂戎逃遁年穀豐登時屬小康禮當終制雖
三年無改義欲化於人倫而正朔有常理宜新於鳳歷爰
布改元之令仍覃在宥之恩天福九年宜改爲開運元年
可大赦天下應今年七月一日昧爽已前三京鄴都諸道

州府見禁囚徒除十惡五逆光火劫殺屠牛鑄錢官典犯
贓僞行印信合造毒藥外罪無輕重已發覺未發覺已結
正未結正咸赦除之流竄之徒其實有咎和平之道亦許
自新其流配人除終身不齒常知所在人外未經量移者
與量移已經量移者與敘用蟲蝗灾疚之邦流夷頗甚獫
狁經過之地凋弊尤深須議優饒用明軫憫其岐雍同華
蒲陝涇邠耀威管內人戶委長吏所在招攜復業之家免
一年租稅魏博貝冀滄景德等州曾經虜騎剽攘特放今
年秋稅其餘經過之地亦量與矜蠲乃賸親軍實推忠節

或從征醜虜顯立勲勞或出討叛臣方期平定至於邊陲
守戍藩鎮分屯盡繫捍防皆施勤效雖賦稅未集帑藏猶
虛宜示頒宣用明獎賞應將校兵士量與等第優給連年
失稔常賦憊期國用未充軍需不足是行率借以濟贍供
誠非欲爲蓋不獲已赦書到日盡行罷征出彼家財資予
國力宜加甄別以示優隆出一千貫已上者特免科徭出
一萬貫已上者咸授官秩無資給者與本處上佐有官名
者依本品序遷竭彼臣誠沒於王事恩宜加等禮有明文
當契丹侵犯之時有守城臨陣盡節亡身者宜令逐處長

吏以名銜奏聞當議超加褒贈或孫或子並與旌酬含垢
匿瑕捨過宥罪前王令典有國通規應有曾行劫盜之人
並宜放罪願在軍者與配軍收管願歸農者委本縣安存
務局因循職掌敗闕空係逋懸之數徒行徵督之文宜示
哀矜並令除放於戲承祧繼統御極居尊雖旰食宵衣每
勤庶政而利兵秣馬未息殷憂更賴四輔三公五侯九伯
文武叶力上下同心竭彼忠貞佐予寡昧舉朝廷之急務
盡軍旅之沈謀使鼓臥旗偃俾成寧謐同文共軌速洽隆
平表乃有功致我無事

卷之二十一
收復青州大赦文

高祖皇帝應天順人化家爲國勤勞庶政安輯四方御衆以寬懷遠以德高秩厚祿以獎勲勞推食解衣以重賢戚至於匹夫匹婦皆被亭毒之恩草木昆蟲悉覃忠厚之德朕恭承丕訓嗣守宗祧奉以周旋不敢失墜兢兢業業若涉大川所賴將相公卿同德比義共扶不逮庶洽於隆平而楊光遠頃以微功驟升亞將後承僞命來拒義師始則桀犬吠堯終則背楚降漢先皇帝方宏大義推以赤心忘彼仇讐歡如魚水亟承重寄久綰親軍累典大藩亦兼重

鎮邇後選男尚主待之以懿親裂地封王寵之以極致人臣之盛近代無儔至於諸子之中皆擢爲牧守家臣之內多遙領郡符此外有非理邀求違法僭濫國家務存終始悉與含宏柰何自至滿盈不勝富貴恩深致怨物盛乃衰而輒信姦邪虛有怨望聞我大喪之後乘我饑饉之年外則勾引蕃戎倚爲勢援內則竊據城壘潛肆窺覬遂使河朔數州頓成瘡痏青邱一境獨陷羈羅朕所以命將興師弔民問罪然猶堅壁拒命自夏徂冬固執其迷自稔其惡其子楊承勲見衆情之攜貳知孤壘之困窮深懷滅族之

憂遂有悛心之請解其戈甲待罪軍門梟彼凶徒傳首闕
下氣靈遽息中外同懼此皆宗社降靈乾坤眷祐將帥勳
力士卒齊心掃千里之封狐不爲民患除三穴之狡兔甚
泰物情念彼一方未能高枕宜行在宥用拯疲羸可取閏
十二月十七日昧爽已前應諸州管內州縣見禁囚徒已
結正未結正已發覺未發覺罪無輕重咸赦除之捨爵策
勲前王之令典錄功旌義有國之常規應收復青州將校
兵士等一自征行再罹寒暑頻親矢石備歷艱辛賊壘旣
平秋毫不犯雖已行頒賚而更議甄酬厚秩美名我無愛

惜其將校自副兵馬使已上員寮并監押使臣並與加恩
十將已上各賜功臣名號已有功臣者更宜改賜自楊承
勲納款歸明楊光遠亦拜章請罪朝廷務宏恩貸特與全
生旣許自新終懷憂憫遂至疾作以及亡身雖悖逆之人
衆所憤怒在君臣之分朕實憫斷棺戮屍情所不忍其
楊光遠尸首許令骨肉收葬楊承勲比從頑父同作不臣
志力旣窮覆亡可待而能轉禍爲福全身保家果傾嚮義
之心所謂見幾而作宜加恩澤以示獎酬其楊承勲宜與
起復除授防禦使仍加官秩其一家骨肉並放罪其弟承

祚承信已在哀制放歸私第烈火焚山始識珪璋之性嚴
霜隕夜方知松柏之心適當危亂之時乃見忠貞之節故
淄州刺史翟進宗清風凜物貞骨凌秋當光遠跋扈之初
被逆黨脅驅之際而仗節守義輕死徇忠終異叛徒以及
遇害雖已行褒贈而未稱朕懷宜覃延賞之恩仍示殊常
之禮其翟進宗靈櫬委本處類會本人骨肉加禮歸葬葬
事官給其子仁欽可特授官資補充東頭供奉官去順效
逆頗蠹人倫濟惡助姦難逃國典前登州刺史張萬迪恩
隆郡寄顯受朝恩不能事君盡忠輒敢從人於亂備彰逆

節須舉明章其張萬迪宜從別勅處分尚在寬宥特免族
誅其骨肉並從釋放國家兵士恩澤頗隆賞賜以時衣糧
甚厚其中有凶惡之輩輕狡之徒不顧妻孥輒背軍伍如
期僥倖難逭嚴誅其青州城下兵士有走投入賊城者並
令指揮殺戮所有逐人骨肉宜從釋放叛賊既下汚俗宜
新同惡者皆就勦除詭隨者並從停廢其餘詐誤宜示矜
寬其楊光遠下惡黨皆已梟首所有隨幕賓從除已殺戮
外餘皆配送邊遠州府常知所在終身不齒縱逢恩赦不
在放還之限其在城及管內州縣鎮員寮將校曾被楊光

遠脅從者一切放罪亡命之人比來懼罪所宜招諭却復耕農自楊光遠作叛已來或有鄉村百姓接便遞相劫殺逃竄山林者並皆釋放仍委本處官吏明宣朝旨招喚歸業如勅命到兩月不歸者復罪如初當令擒捕顯行刑戮其莊田物業亦許力役人戶請射佃蒔忠力之士稟君命而不避危難良善之人入亂邦而橫遭迫脅罹茲患難實可憫傷自楊光遠作叛之初應有差去使臣非理而死者如有子孫量才敍用攻圍之際役使實煩凡有區分皆繫急速稽緩者固當抵罪辦集者豈惜酬勞應青淄登萊充

沂密鄆齊棣等州職員州縣等曾部署輦運者並與加階
減選及轉官加職軍旅所至雖切戒嚴營寨所經寧無踐
食宜寬常賦以慰編甿自王師攻討逆賊大軍下寨之處
所有田苗桑棗應遭蹂踐砍伐宜委本處官吏子細通檢
除今年見苗供輸外來年夏稅並與放一半其去青州三
里內更免今年秋夏殘租興師動衆勞費生靈或則負畚
鋤以從軍或則徵輦運而赴役疲於供命不暇息肩言念
蒸黎宜加優恤應青州管內及鄆齊棣兗沂密等州諸縣
人戶自攻討已來差役科配頻併其今年夏麥殘欠并沿

徵錢物並與除放所有逃移戶口宜令逐處長吏切加招攜青州城市居人等久經圍閉頗是凋殘楊光遠率彼資財奪其糧食至此餓殍宜示憫傷其在城見在貧民委本道以食糧賑恤所有城內屋稅特放一年應洞子頭及城下夫役有遭矢石致死者宜令逐處長吏子細通勘與放二年徭役城郭之內餓殍極多墟墓之間暴骨甚衆方隆渥澤豈限幽明其青州城內餓死百姓及城外墳墓曾遭發掘者並令本道掩藏埋瘞於戲亂常干紀天地不容負國欺君人祇共怒是知福善禍淫之道信而有徵孤恩背

義之人敗不旋踵今則干戈少息海岱已寧凡在股肱更
思康濟庶臻治道同享升平布告寰區咸知朕意

征契丹還大赦文

堯仁御極尚興丹浦之師軒后承乾亦有阪泉之戰是知
五材並用王者不能去兵四氣同功天道不能止殺朕自
躬傳神器勉徇人謀戢干戈而寧耀武威撫夷狄而但修
文德而契丹見利忘義負約渝盟大爲猾夏之灾屢肆窺
邊之暴須爲民而除害遂命將以伐戎駐五輅於大河勞
六師於極塞賴乾坤祐助社稷威靈將相一心貔貅勁力

致羣凶之敗衄血滿平川使元惡之奔逃魂銷廣漠今則
朝陲稍靜中夏小康宜上答於穹旻俾特施於赦宥用導
和平之氣適符長養之風可大赦天下開運二年五月二
十一日昧爽已前應三京鄴都諸道州府見禁囚徒除十
惡五逆持仗殺人強盜官典犯贓合造毒藥屠牛鑄錢僞
行印信外其餘罪犯已發覺未發覺已結正未結正咸赦
除之諸色配流人除終身勿齒并縱逢恩赦不在放還人
及曾爲盜賊并自契丹內來諸色人已於諸處收管外其
餘配流人并常知所在者並放歸其開運二年正月一日

後來配流人等不在放還之限兵戈之地可料傷殘惻隱
之心不舍晝夜所宜優惜用恤疲羸應常定邢貝相并鄴
都已北管界自今年契丹犯境已來有人戶實經虜殺劫
人者其夏稅十分已令減放二分苗子并沿徵錢物今更
特減放一分其今年徵正稅錢物等亦與十分內減放二
分行幸之時往來之處奉迎不闕供億實繁宜示渥恩以
獎勤效應滑瀘兩州迎奉車駕并沿路供頓官員職掌等
仰逐處具名銜申奏當與加恩出師已來遇敵之處忠烈
之士皆效命以衝鋒行陣之間遂捐身而報國宜加延賞

用慰貞魂應北面行營將士等除已與加恩及第支賜優
應給外其有沒於王事者職員宜令逐處分析聞奏當議
超加褒贈子孫已有官者當與敘用其節級長行等如有
親男堪充征行者宜令逐處酌量配軍收管支給衣糧戎
夷侵軼驅脅吏民雖陷虜庭旋歸漢境所宜慰納以示綏
懷應近北沿邊州縣軍鎮官員職掌被契丹脅擁入蕃得
便逃歸者並放罪仍仰切加安撫曉彼易水最處邊陲經
戎虜之攻圍賴軍民之固守將校齊一生聚保全念此忠
勇宜加旌賞其易州被契丹圍逼之時應在州守把城池

刺史官員職掌等仰具名銜申奏並與加恩征討之際饋
運之民不唯飛輓之勞或有抄截之患宜令存恤用示優
宏應鎮定邢洺先差隨軍運糧百姓偶有不迴者委逐處
用勘如有此色其本戶骨肉切加安撫免三年差徭倣擾
之際輕俠之徒偶聚盜於萑蒲遂亡命於山澤宜令招攜
俾復農桑訪聞鄆齊棣等州管界及河北諸縣百姓內有
昨因蕃賊入界接便爲非今遇安寧怕罪未來歸業者宜
令逐處長吏徧行榜示告諭所有本月一日已前罪犯一
切不問宜令並放歸田業各務營生仍委縣鎮鄉村切加

安撫不得恐動如告諭後過百日不來歸業仍前爲惡者
復罪如初逃背軍都誠爲極罪誅夷家口乃是常刑將議
寬矜并從捨釋應諸州府見禁及本營枷項并常知所在
諸軍逃走兵士家口等並宜釋放場院積弊官吏承寬致
課額之逋懸勞朝廷之徵督久淹刑獄深軫予懷爰示優
容俾令除放其安邑解縣兩池前榷鹽使王居敏王景遇
禁盤鹽欠折軍將兩界逋懸累年禁繫宜令三司各詳逐
人所欠如有家業錢填納者可與盡底據數納官餘欠
並本人並放如有欠負錢物數內全無家業錢物填納者

宜與免死配送邊遠諸處收管仍永不得差使所欠特放
河中府雍同華陝虢等州管界內人戶有欠王居敏王景
遇盤鹽腳價者並特放於戲鴈磧方秋稍息烟塵之患雞
竿肆赦是覃雷雨之恩更賴文武大臣中外宿德或決策
巖廊之上或提戈軍旅之間嘗膽爲懷摧凶是念速除餘
孽共集殊勲克致澄清永銷氛穢仍遣赦書日行五百里
敢有以赦前事相擾告者以其罪罪之布告遐邇當體朕

懷

欽定全唐文卷一百二十目錄

漢高祖

和買戰馬詔

諭鎮州趙贊詔

即位求賢詔

誅杜重威詔

答盧擢請許朝臣封贈父母勅

改名勅

幸澶魏御札

至東京大赦文

北巡赦文

改元乾祐大赦文

欽定全唐文卷一百二十

漢高祖

帝姓劉氏諱暠初名知遠其先沙陀部人唐乾寧二年生
初事唐明宗後事晉高祖天福六年授北京留守八年進
中書令開運二年封北平王四年二月少帝北遷羣臣勸
進即皇帝位改今名在位二年年五十四謚曰睿文聖武
昭肅孝皇帝廟號高祖

和買戰馬詔

朕方以勤儉一身輯和庶政未嘗枉費所切安人今則重

威未賓契丹尚擾必多添於戰騎期大振於軍威言念煩勞事非獲已

諭鎮州趙贊詔

卿燕臺大族唐室懿親作鎮方隅既多善政應時制置素有嘉謀實兼文武之才比擅方圓之譽惟卿之身久從迫脅居胡土而當全骨肉還漢疆而近脫鋒鏃浮沈祗係於虜情舒卷非繇於已意想其扼腕常所吞聲朕猥以眇躬式隆丕構承皇天眷命副羣后樂推方救阽危用拯塗炭昨契丹見華人不附尋已促還今酋長爲神物所誅俄聞

暴卒興亡之兆其理昭然其永康王遁入鎮州與卿顯相
疑惑今月一日於待賢館內已被縛俘所有寮屬將校並
遭誅戮冤聲遙聽慘性可量想計聞之必多酸楚卿一門
忠孝三代王公須自雪家冤當共清國難於我則旣明向
日於彼則無與同天自然燉土分茅長居爵位重茵列鼎
永慶來雲孟津之會宜先塗山之期勿後況車駕按幸已
及晉州無致他人別邀富貴臨軒睠注寤寐不忘所有諸
道申奏蕃賊等逃遁事繇表章文狀等並同封往其三軍
官吏僧道百姓等別降勅曉示撫問用符卿意當體朕懷

金文卷之二
即位求賢詔

古者詢芻蕘之言採歌詩之風冀求利病以省是非況濟濟盈朝謇謇就列懷才抱器博古知今苟無宏益之辭曷表翊扶之力起今後文武百寮每遇後殿起居日仰具利濟上章以聞次第循環周而復始嘉謀嘉猷之告庶得聞知可大可久之規期於曉達亦聆此事向來已行但率皆浮言鮮克忠告良由時或拘忌人有依違遂使急務慎於指陳浪語盈於章奏有名無實阿旨取容今則不然所宜改作凡有封事並可直言無用飾詞務存確論輔此不逮

稱朕意焉

誅杜重威詔

杜重威猶貯禍心未悛逆節鴟音不改虺性難馴昨朕小有不安罷朝數日而重威父子潛肆凶言怨謗大朝扇惑小輩今則顯有陳告備驗姦欺既負深恩須置極法其杜重威父子並處斬所有晉朝公主及外親族一切如常仍與供給

答盧擢請許朝臣封贈父母勅

盧擢忠勤奉職讜直立言貢以封章舉其墜典詳觀宏益

尤切歎嘉宜下所司並令舉奏

改名勅

朕祇膺景命肇啟鴻圖適當建號之初宜舉正名之典夫
名以制義義以出禮禮以體政政以養民載考格言抑有
彝訓顧惟寡昧敢忘率循但君父之名貴於易避臣子之
敬難以斥尊苟觸類以妨言必迂文而害理況宗廟方建
禋祀非遙祝嘏將期於正辭稱謂所宜於稽古爰從改革
庶叶典章凡百臣寮當體朕意今改名嵩故茲札示想宜
知悉

幸澶魏御札

朕自副推崇敢忘寅畏及物必加於恩信任人無間於親疎期區宇之大同俾蒸黎之小泰洎朕始臨梁苑畢會藩侯蓋當再造之期用普維新之命莫不駿奔入覲率俾爭先旌旄之寄咸遷帶礪之盟益固魏博杜重威負釁雖重在朕含垢亦深盡捨前非只期後效是以授之真秩換彼名藩而禍胎已成妖氛復作北勾賊虜南拒朝章若不加誅何以爲法蹟我天憲勞我兵威今則大進梯衝克收壁壘重念一夫作孽百姓何辜雖已推祝網之仁尚宜軫納

隍之慮必恐孤城既拔衆怒猶深黨驚廳更迅於雷霆即烈焰寧分於玉石朕所以軫傷在念想慮尤深將親勞於六師宜再詢於順動豈辭櫛沐須議省巡取今月二十九日車駕起離闕下暫幸澶魏已來凡百士庶宜體朕意

至東京大赦文

王者興膏雨之師所以蕩瑕穢下哀痛之詔所以弔傷夷朕頃自晉朝俾乂并土屬戎夷兆亂致干戈日尋每懷如燬之憂嘗竭扶顛之力旋以金行失馭天驕縱暴北陷河塞南踰官渡盜據宮闕凌辱衣冠蹂踐我京畿虔劉我生

聚田不易壠人不聊生犬羊布於四郊腥穢聞於千里人
既思主朕實疚心遂乃建彼義旗整斯戎輶雪萬民之枉
抑期九土之和平求理之端惟刑是恤況時當養物仁在
好生爰覃解網之恩用廣泣辜之道應天福十二年六月
十五日昧爽已前諸道州府見禁人等已結正未結正已
發覺未發覺除十惡五逆外其餘罪無輕重咸赦除之三
司地征六營軍費素懸數額皆有限程但以兵革屢興旱
蝗相繼蓋督吏不能開許致疲民無以供輸苟不蠲除轉
成困敝天福十一年已前諸道州府應係殘欠稅租並特

除放朕昨夙駕河汾薄狩陝虢洎及京邑周覽神臯禾黍廢爲閒田牆屋毀爲平地淒涼滿目指顧傷心且農夫不耕廩食何取蠶婦不織府帛何輸言念流離諒宜矜恤況朕頃在藩翰備譖稼穡自臨大寶首念蒼生常久困於蕃戎欲盡蠲其租賦又以干戈未弭士馬方繁月無見糧歲無常給特於經費須此減除其東西兩京畿道遭契丹蹂踐暴苦處人牛俱喪蠶麥不收雖近復田園固無可輸納其東西兩京一百里內今年夏稅及沿徵物色並與蠲放其一百里外曾有契丹經過劫掠之處委本處官吏躬親

恤問如實被契丹蹂踐不虛其今年夏稅大小麥苗子沿
徵物色等各放一半其京城內先遭張彥澤明行拷捶劫
掠資財兼被契丹毀拆屋舍括率緝錢久屬艱危併罹殘
虐爰符望幸用慰來蘇其京城內今年廩稅與減一半兩
露之恩豈宜有間文武之吏咸與維新應內外臣寮及京
百司并諸官吏將校等各具名銜申奏當與加恩應有契
丹除授諸道節度觀察防禦團練使刺史及令錄賓寮將
吏等並各安職任不議改更勉思共理之規更俟維新之
命或曾經謫宦又念投荒苟亡惻隱之恩何示照臨之德

應已前貶降官未量移者當與量移已量移者便與敍錄應該徒流者與放還近因儉狁猖狂崔蒲充斥交相劫剽不問官私遂令王事之人空有係官之數應屬省務局錢穀曾經契丹及草寇般擊處據已勘到實數仰三司具指實條奏當議別有指揮應係欠省司錢物尚令逐處徵催全放則因便生姦加罪則困窮可憫宜下三司據見有家業抵當外如實無充折者特貸餘生更無任使亡命不逞之徒殘民蠹物之類或隱藏山谷或畏懼典刑及今日已前結集爲非者並不問罪仍令所在長吏丁寧曉諭如願

在軍都者量材安排如不願在軍都者即任歸農業與限
兩月明示招攜如限滿依前結集爲非不議寬恕即嚴加
捕捉復罪如初浚都重地汴水名區控襟帶於八方便梯
航於萬國眷言王氣允稱皇居其汴州宜仍舊爲東京朕
以肇興寶歷克嗣炎精遐追雍雒之宏規仰仗高光之盛
烈其國號宜改爲大漢朕始事晉以至開國雖易服建號
固有通規念舊懷恩未忍改作其年號仍舊稱天福於戲
帝王之道亭毒爲先黃老之言清靜爲本用示滌瑕之典
宜敷作解之恩矧惟臨馭之初方屬艱難之運當欲盡除

疾苦漸致康寧用遵置器之方庶減納隍之慮凡在遐邇宜體朕懷

北巡赦文

自古聖帝明王開基創業輯寧庶彙康濟四方行寬大之恩不遺遐邇布含宏之德無隔華夷頃屬前朝季年中原失馭蒸黎板蕩寓縣分離寰區爲戎虜之鄉宮闈作腥羶之地百萬家之生聚俱陷虎狼數千里之人烟頓成荆棘朕屬茲多難思庇生民憫晉祚之覆亡憤胡塵之紛擾繇是痛心疾首躍馬提戈慕大業於高光起義師於汾晉匈

奴運盡魁首天亡殘孽遺妖奔巢走穴繼平凶醜再造乾
坤盡復諸華不失舊物顧惟眇質獲荷寵靈怵惕於懷憂
勤在念朝野亂離之後國家開創之初每慮德澤未優照
臨尚狹懼一夫之不獲恐一物之乖宜思濟艱難靡遑宵
旰大河之北易水之南久困兵戈聚成瘡痏男孤女寡十
室九空念此興懷潛然出涕近者北地州府相次歸明覩
千里之坦夷顯羣心之忠順今則方當展義爰用省方宜
宏及物之恩用廣惟新之澤應鄴都管內及邢洺慈相衛
鎮深趙貝冀博滄景德易定祁泰等州管內應見禁罪人

取十月五日昧爽已前已結正未結正已發覺未發覺常
赦所不原者咸赦除之自契丹爲患已來逆虜所至之處
劫掠之外殺害實多方布仁慈豈限存沒應河北曾經契
丹殺害處所有無主骸骨並仰所在長吏勤加指揮收斂
埋葬其有官員將吏歿於王事及曾被契丹脅從指使反
遭殺害者並可搜訪逐人子孫及親嫡骨肉具名聞奏當
與量材任使必令存濟捨過錄功方務含垢捕亡服叛惟
切推誠契丹節度使麻答見在定州自前曾輸款誠欲來
歸順已降詔諭想計聞知當俟傾心別加殊渥幽燕瀛莫

舊屬蕃戎惟彼生靈久遭屈辱近知軍民憤激志願歸明
苟能密設機謀審圖禍福必然成事終享功名上郡雄藩
當用酬獎鎮州殺僇契丹之時軍人百姓並立勲效其軍
都將校員寮已行恩澤訪知百姓鬪敵之際死傷甚重聽
聞已來傷歎尤切其逐人本家宜令本道常加優卹向者
有漢地諸色人員隨契丹北徙未能歸還去國離鄉益加
憫念其本人骨肉仰所在存卹倍加安撫先有諸色人曾
伏事著契丹官員者一切放逐穩便所在不得動搖於戲
上天悔禍黔首愛生敢忘兢慎之心冀合昇平之運凡在

黎庶當體朕懷

改元乾祐大赦文

昔我藝祖神宗開基撫運以武功平禍亂以文德致昇平澤潤生民慶流長世淳耀之德不泯延洪之業無窮肆予冲人猥集大命荷上穹之眷祐揚列聖之耿光底定四方奄有萬國續堯承緒欽若永圖嗣夏配天不失舊物乃者有晉失馭羯賊亂常蛇虺肆毒於寰區豺狼暫穴於宮闈虔劉我生聚俘掠我吏民戎馬所經人烟殆絕海內無主天下騷然朕方在躍潛遇茲屯難秉旄誓衆憤其家國之

仇冒暑出師雪彼生靈之怨皇天后土悔禍誘衷胡虜喪
亡遼羯潰亂腥羶屏氣屬縣歸心按六轡而嚴屬車克寧
西道走空函而飛折簡遂定中州旋以王業尚艱魏郊斯
梗當思康濟爰議省巡一方旣靜於烟塵九野漸期於清
晏今則已旋魏闕正屬王春三陽布和四序更始宜宣德
澤以順發生紀號易年式顯鼎新之祚宥過懋德載覃渙
汗之恩可大赦天下改天福十三年爲乾祐元年自正月
五日昧爽已前犯罪除十惡五逆外罪無輕重已發覺未
發覺已結正未結正咸赦除之諸貶降官未量移者特與

量移已量移者與復資敘用諸色配流人並放還鄉里其
除名不齒者量與敘錄諸處散關場院官自前有因縣欠
折節目並無抵當灼然無可徵督者宜令三司勘覆聞奏
豐阜之道耕種爲先宜伸勸課之條以重衣食之本應天
下戶口夏稅見供輸頃畝稅賦外一任人戶開墾荒地及
無主田土五年之內不議納稅亦聞自前有此指揮始即
許其開耕旋乃却行簡括既非誠實顧失輯綏朕以化理
域中信敷天下必無改易庶廣耕桑宜令所在長吏明行
曉示自中原板蕩編戶瘡痍凶歉薦臻逋逃未復加以徵

賦煩重差配頻仍言念疲羸宜伸撫恤比聞州縣調役未
甚均平秋夏供輸不依條制生靈受弊胥吏成奸宜儆尤
違俾循軌度所有逐處戶口宜令觀察使刺史縣令設法
招輯除宣省指揮外不得非理差配其合充色役人戶不
許官吏州縣影占務均苦樂其秋夏輸納只依朝廷指揮
受納不得有加耗取覓若或差人察訪不虛其主者監官
必加深罪更在藩侯郡牧共理分憂嚴設科條以副委任
一昨親征鄴部暫駐野營周覽鄉川備觀凋瘵所宜優恤
以召和平其鄴都四面人戶去城三十里內所有天福十

二年賦稅并緣徵一物已上并可特放其無主破毀墳墓
仰差官吏如法掩瘞兵荒之際寇盜連羣自朕始及京師
已宣赦宥尚聞結集未復家園豈非告諭之未嚴慰撫之
未至今則陽春資始東作將興雨雪及時耕桑有望所宜
各歸營養自取安全式敷在宥之恩載啟自新之路應諸
處有前自爲非惡跡之人一切放罪不問便可安家樂業
各歸營農所在不得動搖赦書到後仍與限一月若不歸
本家復罪如初當令緊切擒捕必無矜恕仍別有條理指
揮恭惟列祖園陵諸聖祠廟桑田變海當時之弓劒猶存

精爽在天終古之威靈不泯載惟追感誠切永懷其雍州
西京及諸州府應有諸帝陵廟仰所在修奉務令完葺國
家大事惟祀與戎苟蘋藻之不虔則神祇之安享起今後
凡有祠祭所供用之物務在豐潔宜令有司精細點檢向
者桀虜亂華或有抱幽冤而沒地王師薄伐或有徇忠節
以隕身念彼遺魂宜覃霈澤自國家舉義已來應有將校
臣寮沒於王事及晉朝臣寮枉遭契丹屠害者並與追贈
如追贈爵秩未高者更與贈官仍令搜訪子孫量材敘錄
朕昨展義省方討違伐叛適當平定且錄勤勞應扈從鄴

都城下内外文武臣寮及馬步諸軍將校并在京都署巡
檢官員職掌諸軍將校等升除已行恩命外所有未曾加
恩者宜令中書門下條舉聞奏兼鄴都已來沿路州縣迎
奉大駕供饋宿頓糧草無遺闕處其職掌及州縣官吏並
可等第甄錄天下名山大川聖帝明王忠臣烈士祠廟墳
墓委所在量事修葺自唐莊宗後來應有文武大臣功德
昭著者其陵替子孫量與敘錄其有先曾仕契丹并有骨
肉見在契丹者其本人本家所在切須安存不得妄有恐
動朕昔在藩邸頗熟臣寮文武之才常備觀其梗概方員

之用宜更察於精微俾取質於衆多庶無遺於俊造應文
武常參官仰準唐建中年故事上任後三月表舉一人自
代軍國之費務在豐財關市之征資於行旅所宜優假俾
遂通流應天下商旅往來所在並須饒借不得妄有擾勒
卑宮菲食前代之令猷革舄綿衣哲后之明德至於損上
益下惜力愛人冀息煩苛漸期富庶所有乘輿服御後宮
費用大官常膳一切減損在京及內諸司並天下州府除
應奉軍期急切外其餘不急之務非理營造並皆停罷免
致勞役徵聘邱園免遺邦彥恢張名教俾厚人倫應有蘊

蓄器能精通理道文理該博武略縱橫而退遁於家高尚其事者委所在訪尋當俟徵用義夫節婦孝子順孫仰具聞奏即議旌表於戲創業惟難守成非易敢忘馭朽思致偃戈更賴文武股肱藩后同心康濟勠力弼諧永冀隆平共臻仁愛凡在戴履宜體朕懷赦書有所未該者委有司舉奏赦書日行五百里敢以赦前事言者以其罪罪之